

आकाशवाणी

खास-खास खबरां:-

- प्रधानमंत्री नरेन्द्र मोदी अज्ज इजरायल दी दंडु दिनें दी सरकारी जात्तरा पर इजरायल रवाना होडन। इस दरान ओह इजरायल दे प्रधानमंत्री बेजामिन नेतन्याहू हुंदे कन्नै बैठक करडन।
- भारत ते इजरायल नै आतंकवाद ते आतंकी गुटें सनें उं'दे समर्थकें कन्नै निब्वडने दी अपनी वचनबद्धता फही दोहराई ऐ।
- केन्द्री मंत्रिमंडल नै केरल राज्य दा नांऽ बदलियै केरलम करने दे प्रस्ताऽ गी मंजूरी देई दिती ऐ।
- शैहरी हवाबाजी सरबंधी निदेशालय –डी.जी.सी.ए नै हाल दे समें दरान बधदे ज्हाज हादसे दे मद्देनजर चार्टर ज्हाजे दे संचालकें लेई सख्त सुरक्षा निर्देशें दी घोषणा कीती ऐ।
- रुस ते यूक्रेन बश्कार फौरी तौर पर युद्ध विराम दे आहवान आले प्रस्ताऽ पर कल संयुक्त राष्ट्र महासभा दे मतदान च भारत नै हिस्सा नैई लैता।
- मर्दे दे टी-20 क्रिकेट विश्व कप दे कल खेड्डे गेदे सुपर-8 दे मुकाबले च इंग्लैंड नै पाकिस्तान गी 2 विकेटें कन्नै हराई दिता ऐ।



PM -Israel

प्रधानमंत्री नरेन्द्र मोदी अज्ज दंडु दिनें दी सरकारी जात्तरा पर इजरायल रवाना होडन। श्री मोदी हुंदी इजरायल दी एह दुई जात्तरा होग। इस दरान ओह इजरायल दे प्रधानमंत्री बेजामिन नेतन्याहू हुंदे कन्नै बैठक करडन, जेहदे च भारत ते इजरायल दी रणनीतिक सांझ-भ्याली च होई दी महत्वपूर्ण प्रगति दी समीक्षा कीती जाहगा। ओह विज्ञान ते तकनीकें, नमियें काहड्डें, रक्षा ते सुरक्षा, राई-बाई, पानी दे प्रबंधन, बपार ते अर्थबवस्था सनें दौनें देशें दे लोके बश्कार आदान-प्रदान ते केई खेतरें च सैहयोग दे मौके पर गल्लबात करगंन। बैठक च दौनें मुलखएं दे हितें आले इलाकाई ते वैश्विक मुद्दें पर बी बचार-बटांदरा कीते जाने दी मेद ऐ। इजरायल च भारत दे राजदूत जे.पी. सिंह होरें आकाशवाणी दे बशेश संवाददाता गी दस्सेया ऐ जे प्रधानमंत्री मोदी- अज्ज इजरायल दी संसद क्रेसेट गी गी सम्बोधित करडन। इयां करने आले मोदी होर पैहले भारती नेता होडन। श्री मोदी कल इजरायल दे राष्ट्रपति इसहाक हज़ांग हुंदे कन्नै मलाटी करडन।



India-Israel Anti- Terror

भारत ते इज़रायल नै आतंकवाद ते आतंकी गुटें दे कन्ने-कन्ने उन्दे प्रतिनिधियों, समर्थकें, प्रायोजकें, उनेंगी रपेया-पैसा देने आलें ते उं'दे मददगारें कन्नै निब्वडने च सैहयोग दी वचनबद्धता फही पक्की कीती ऐ। कल नमीं दिल्ली च आयोजित भारत ते इज़रायल दे सांझे कार्य समूह दी आतंकवाद-रोधी 10मीं बैठक दे दरान दौनें पक्खें आतंकवाद दे सब्भनें प्रारुपें ते अभिव्यक्तिएं दी सख्त निंदेया कीती ते इस गल्लै पर जोर दिता जे आतंकवाद दा मुकाबला करने लेई लगातार, व्यापक ते संगठित कार्रवाई दी लोड ऐ। भारती प्रतिनिधिमंडल दी अगुआई बदेश मंत्रालय च आतंकवाद रोधी मामले दे संयुक्त-सचिव विनोद बहादे होरें कीती। दौनें पक्खें भारत ते इज़रायल च होए दे आतंकवादी हमलें दी सख्त निंदेया कीती ते इन्दे लेई जिम्मेदार लोकें खलाफ सख्त ते फौरी कार्रवाई दी जरुरतै पर बल दिता। दौनें पक्खें भारत- इज़रायल रणनीतिक सांझेदारी दी भावना ते एहदे व्यापक दायरे पर बी लोड पाई। दौनें देशें दपक्खी ढांचे दे तैहत सिखलाई, साईबर सुरक्षा, उत्तम प्रथाएं दे आदान-प्रदान ते सूचनाएं दे माध्यम कन्नै सैहयोग बधाने पर बी चर्चा कीती। आतंकवाद-रोधी सांझे कार्य-समूह दी अगली बैठक इज़रायल च आयोजित कीती जाहग।

<><><><><><>

Prez Maharashtra Visit

राष्ट्रपति द्रौपदी मुरमू होरें आखेआ ऐ जे नागरिकें दी सेहत, सांझी जिम्मेदारी ऐ। उं'नें आखेआ जे गरीब शा गरीब लोकें गी समें-सिर पूरी-पराती डाक्टरी सुविधां जकीनी बनाने लेई सब्भनें गी रलियै कम्म करना लोडचदा ऐ। राष्ट्रपति होरें कल मुम्बई दे पी.डी. हिंदुजा अस्पताल च जीवन बचाने ते मता सेहतमंद भारत बनाने सरबंधी विशे पर इक राष्ट्रव्यापी अभियान दा शुभारम्भ कीता। राष्ट्रपति होरें अपने सम्बोधन च सेहत दे महत्वै पर बल दिता। उं'नें आखेआ जे सरकार नै पिच्छले दहाके च एह जकीनी बनाने लेई नेकां महत्वपूर्ण गैही पुट्टियां न जे सब्भै नागरिक सेहतमंद रौहन ते उं'नेंगी सेहत दिक्खभाल आली बेहतरीन सुविधा हासल होन। राष्ट्रपति होर महाराष्ट्र दे दंऊ दिनें दे दौरे पर कल मुम्बई पुजियां- जित्थे ओह अज्ज राष्ट्री आरोग्य मेले दा उदघाटन करगंन।

<><><><><><>

Kerala Name

केन्द्री मंत्रिमंडल नै केरल राज्य दा नांऽ बदलियै “केरलम” करने दे प्रस्ताऽ गी मंजूरी देई दिती ऐ। सूचना त प्रसारण मंत्री अश्विनी वैष्णव होरें केन्द्री मंत्रिमंडल दी बैठक दे बाद पत्रकारें गी दस्सेया जे कैबिनेट दी मंजूरी दे बाद राष्ट्रपति, केरल दा नाऽ बदलने सरबंधी विधेयक-2026 गी केरल दी विधानसभा गी अपने बचार पेश करने लेई भेजडन। उनें दस्सेया जे विधानसभा दे बचार हासल होन दे बाद केन्द्र सरकार अगगे दी कार्रवाई करोग ते संसद च केरल राज्य दा नांऽ बदलियै “केरलम” करने लेई इस विधेयक गी पेश करने लेई राष्ट्रपति हुंदी सफारश हासल कीती जाहग। उनें आखेआ जे केरल विधानसभा नै 24 जून 2024 गी राज्य दा नांऽ बदलियै “केरलम” करने दा प्रस्ताऽ पेश कीता हा।

<><><><><><>

DGCA

शैहरी हवाबाजी सरबंधी महा-निदेशालय डी.जी.सी.ए नै हाल दे समें दरान बधदे जहाज हादसें दे मद्देनजर चार्टर जहाजें दे संचालकें लेई नमें सख्त सुरक्षा निर्देशें दी घोशणा कीती ऐ। कल लाई गेदी इक उच्ची सतह दी समीक्षा बैठक दे बाद एह फैसला लैता गया। डी.जी.सी.ए नै आखेआ जे चार्टर ते वी.आई.पी. डुआरियें सनें सबतें गैर अधिसूचित डुआरिएं दे बारे च सुरक्षा दी बिनाह उप्पर कमांडर पाइलट दा फैसला अखीरी होग। जहाज चलाने आलें गी जहाज दी उम्र, रक्ख-रखाऽ सरबंधी इतिहास ते पायलटें दे तर्जुबें जनेह प्रमुख सुरक्षा ब्यौरें सार्वजनिक करने होडन। डी.जी.सी.ए, सुरक्षा रैंकिंग, कॉकपिट वॉयस रिकार्डर ते डेटा ऑडिट दी शुरुआत करोग। सिस्टम च कुसै बी चाल्ली दी खामी लेई वरिष्ठ प्रबंधन लेई जिम्मेदार ठहराया जाहग।

<><><><><><>

India –UN

संयुक्त राष्ट्र महासभा नै रुस ते यूक्रेन बश्कार फौरी तौर पर मुकम्मल ते बिजन शर्त युद्ध-विराम दे आहवान दा प्रस्ताऽ पास करी दिता ऐ। 193 सदस्यें आली महासभा च 107 देशें प्रस्ताऽ दे मसौदें दे पक्ख च- जिसलै के 12 सदस्यें एदे बरोध च मतदान कीता। भारत, बहरीन, बांगलादेश, ब्राजील, चीन, दक्खन, अफ्रीका, श्रीलंका, संयुक्त अरब अमीरात ते अमरीका सनें 51 देशें मतदान च हिस्सा नैई लैता।

एह प्रस्ताऽ यूक्रेन दी तरफा पेश कीता गया हा। इस प्रस्ताऽ च संयुक्त राष्ट्र चार्टर सनें अंतराष्ट्री कनून दे मूजब, व्यापक न्याऽपूर्ण ते स्थाई रमानदारी दे आहवान गी परतियै दोहराया गया ऐ।

<><><><><><>

VP -JK Visit

उपराष्ट्रपति सी.पी. राधाकृष्णन होर अज्जै थमां जम्मू-कश्मीर दे 2-रोजा दौरै पर आवा'रदे ना। अपने पैहले-पैहले दौरै दौरान उप-राष्ट्रपति होर श्रीनगर च युनिवर्सिटी ऑफ कश्मीर दे दीक्षांत समारोह च बतौर मुख् परौहने शामिल होडन। घाटी च एदे लेई सुरक्षा दे व्यापक बंदोबस्त कीते गेदे ना। सुरक्षाबलें आसेआ जांच बदाई दिती गई ऐ ते महत्वै आहले थाहरें ते औने-जाने आहली थाहरें कश बाद्दू नाके लाए गेदे ना। जवानें दी गश्त बदाई गई ऐ। कुसै बी चाली दी माड़ी हरकत गी रोकने लेई चानचक्क निरिक्षण वगैरा बी कीता जा'रदा ऐ।

<><><><><><>

T-20 Cricket

टी-20 क्रिकेट विश्व कप च कल रातीं सुपर-8 दे मुकाबले च इंग्लैंड नै पाकिस्तान गी 2 विकट कन्नै हराया। श्रीलंका च पल्लेकेले अंतराष्ट्रीय क्रिकेट स्टेडियम च खेडु गेदे मैचे च इंग्लैंड नै 165 रन्ज दे लक्ष्य गी 8 विकट मुहाइयै 5 गेदां बाकी रौहन्दे हासिल करी लैता। पाकिस्तान नै तय 20 ओवरें च 9 विकटें दे नुक्सान पर 164 रन्ज बनाए। अज्ज सुपर-8 च न्यूजीलैंड ते श्रीलंका बश्कार मैच कोलम्बो च संजा 7 बजे होग।

<><><><><><>

Ranji Trophy

जम्मू-कश्मीर क्रिकेट टीम नै रणजी ट्रॉफी दे पैहले दिन अपना दबदबा बनाया। कर्नाटका क्रिकेट टीम खलाफ खेडदे होई टीम दा स्कोर पैहले दिन 2 विकटां मुहाइयै 284 हा। शुभम Pundir नै 117 रन्ज बनाए न ते क्रीज पर बने दे ना। अब्दुल समद नै 52 रन्ज दी पारी खेडु। दौनें खडारियें कर्नाटक दे गेंदबाजें गी परेशान करी दिता। पैहले दिन दी मज़बूत शुरुआत कन्नै जम्मू-कश्मीर दी टीम अज्ज बी अपना बेहतर करने दी कोशिश करोग।

<><><><><><>